

丁文誠公奏稿

丁文誠公奏稿

卷之八目錄

密陳登萊青道員缺喫重片

同治九年十一月三十日

會勘張秋築隄束水未敢遽行並現濟運濬河情形

摺

同治十年正月二十二日

遞陳官累請免扣坐支二成摺

同治十年四月二十九日

請在東省置買墊地片

同日

整頓山東水師購造船礮摺

同治十年七月二十九日

預籌海防情形片

同治十年七月三十日

密保京外各員片

同治十年八月初一日

黃水衝缺侯家林民堰請截漕備賑摺

同治十年九月十一日

請優卹王心安片

同治十年九月三十日

病請開缺調理摺

同治十年十月十四日

籌堵侯家林決口銷假督工摺

同治十年十二月二十九日

侯家林堵築事宜擇日進占摺

同治十一年正月二十五日

密陳登萊青道員缺喫重片

同治九年十一月三十日

再登萊青道一缺自煙臺海口設立通商海關監督歸該道經理近年以來該道均駐紮海關誠以該處洋商雲集逐日皆有貨船進出口稽查抽收一刻不容疏懈且中外一切交涉事件尤須與領事隨時晤商行止以免延誤責任綦重然臣竊查該關近日情形其中外交涉事件所最難浹洽者似不在通商而在傳教蓋通商一事其於商人交涉者既設有領事官主持其於貨物交涉者又設有稅務司總理已覺有條不紊而其船之往來稽查也有定章貨之進出抽收也有稅則更覺成法可循且中外商人攜本營生類皆聚集一方公平交易各無相強是以東

省通商數年來並無軼轍不清之事惟傳教則不然其爲外國而來者爲主教其由中國入教者爲教士主教慮不能徧行其教則多借教士以廣其招徠教士慮無以悅其主教則多誘鄉民以入其羅網然教士雖多方誘之而一家之中有願入教者卽有不願入教者一族之中有甘心入教者卽有羣起而禁其入教者其入教者以教爲是其不入教而並禁之入教者必以教爲非口角之衅旣以易啟而教士又皆係土著居民其於入教者則阿附主教以爲此教士也雖有罪必多方護之其於不入教而並禁其入教者則慫慂主教以爲此毀教也雖良善亦極力攻之攻之不得則且尋細故以中傷之甚至積惡匪徒一經入

教卽可以抗傲官長而欺侮鄉鄰故洋人傳教率多與中國居民筆衅釀事其弊實由於此蓋通商一事本不牽涉地方但得商情熟悉卽覺暢達無阻傳教一事全在調度居民必使內外帖然乃能相安無事故臣所謂中外交涉事件辦理最難浹洽不在通商而在傳教者此也東省民情悍滑惟登萊青三府地處東隅尙稱樸拙而強悍亦出自性生近來傳教之士漸延於登萊兩郡臣心竊憂之屢嚴飭地方道府州縣遇事秉公妥辦以期消患於未然年來尙無決裂然臣距該府幾八九百里凡遇教民有事未能卽時辦理均由該道先行查辦再行稟臣覈明批飭辦理已覺緩不濟急是登萊青道一官其辦理通商者任雖

重而尙可從容以圖其辦理傳教者自非地方民情熟悉於中未易操縱得宜也現在劉達善因病呈請開缺臣已據情奏請

簡放

聖明洞鑒必能因地擇人惟臣近見民教滋事之案不一而足大率皆由地方官未能洞悉民情一遇有事又不能權衡輕重斟酌辦理遂致滋事且地方難易情形今昔亦各不同臣是以不敢不縷悉

上聞萬一

簡放之時或洋務與地方兼悉之員一時實難其選則東省之候補道潘駿文暨濟南府知府龔易圖兩員久於東

省民情極熟且廉介通達爲守兼優均足以備

採擇

臣

爲重地亟須得人起見謹冒昧密陳伏乞

聖鑒訓示謹

奏

會勘張秋築隄束水未敢遽行並現濟運濬河情形

摺 同治十年正月二十二日

奏爲會勘張秋築隄束水費鉅害重未敢遽行並現辦保護運道挑濬河身稍期補救以濟漕運各事宜恭摺具奏仰祈

聖鑒事竊 臣等於同治九年九月間准戶部咨調任漕張之萬陳奏山東黃河穿運處所橫流無所鈐束者數十里北趨南徙到處沙停因擬築南北兩隄並酌留運口築做草閘以爲束水攻沙之計其無關運道處所不必普律興修奏奉

允准飭下 臣等按照所擬辦法會同估計酌量興辦等因

當經臣寶楨以築隄束水一事現時體察情形如欲築做必須就蘭工口門兩岸接續方能一氣聯絡事關黃河改道仍復穿運而行未敢率議舉行奏請

飭令張之萬來東會勘商辦於同治九年閏十月二十九日欽奉

諭旨飭令臣兆棟早赴新任卽帶同章儀林剋期起程前赴山東會同蘇廷槐丁寶楨體察情形核實勘估熟商辦理總須無害民田有益河運方爲妥善等因欽此臣等跪讀之下仰見

聖慮周詳無違弗屆莫名欽服臣兆棟遵於正月十三日臣寶楨遵於十五日臣廷槐遵於十七日先後均抵濟甯

晤商先將黃流變遷之情運河淤墊之處參以上下游形勢詳細審度次將安興墓等處南北築隄於運道民田利害輕重並酌留運口築做草閘能否得力兼權熟計期於國計民生兩有裨益伏查黃河穿運迄今十有六年運河之爲病旣深民田之受害尤重臣等旣身當其事若使南由安興墓至沈口迤東北由曹家隄口至漁山中築大隄兩段卽於運道民田有利無害不至顧此失彼雖使費盡帑金竭盡心力亦何敢稍形推諉惟查目前情勢實有不容輕議者蓋黃水穿運而後以漕運而論運河之淤墊僅在張秋口門上下數十里及張秋以北河身百數十里而民田之淹沒者則自濮范至利津海口一千餘里已不下

二十餘州縣然運道之墊淤尙有可疏濬之方而民田之淹浸實別無挽回之術今若自張秋以西南北兩岸分築大隄竟置上下游於不問誠慮上游汎濫之水無所攔束當盛漲之時或由空缺之處越過新隄則新隄恐成虛設卽或上游地形較高水勢不能遽行漫溢而中段旣束下游毫無隄防黃流挾建瓴之勢直趨張秋奔騰傾瀉則東阿以下至利津十數州縣城池居民益被淹沒爲害甚烈然此猶就水勢現趨東境常情測之也若築隄束水而於兩岸新隄各酌留運口三丈以爲潛船出入門戶並令運口兩岸河身之外不過二百丈使水束緊則溜急又築做草閘平時堵閉以免黃水倒灌彼黃流性激勢猛迥異他

水卽以河南現時情形比論兩岸中闊數十里而隄之高
厚堅實較新築者不啻倍蓰然每遇伏秋大汛險工迭出
時虞潰決今以二百丈之河身緊束洪流又以不可恃之
草閘堵遏水口誠恐築做之後河性喜灣萬一下游漁山
一帶狹窄處所過水稍形壅滯而上游一氣奔注則新築
之隄閘恐難當其衝激奪運北趨亦屬事之可慮設不幸
而有此失則東省之東昌臨清直隸之天津河閒地較窪
下淹沒何可言狀而北路衛河亦將日形壞裂兼以此處
切近

畿疆害尤不可思議從前同治四五兩年試行河運議挑
南壩頭口門頗費斟酌卽調任漕臣張之萬曾有挑挖穿

運處深淺之間毫無把握之奏是亦深恐黃水趁溜奪運北趨之意臣等籌念及此誠不得不長慮而卻顧也惟漕運爲

國家經久之規現旣通籌全局築隄勢有難行亦應別作他圖急求補救茲臣等會商悉心參酌竊謂目前時勢惟有於鄆城沮河一帶遏黃水之東流卽以保南路之運道於張秋八里廟各處疏運河之淤墊卽以通北上之漕行似於束水濟運稍有裨益查現在黃水正溜洪川口實當其衝由此逐漸南移坐灣偏向東流大溜已在安山之三里鋪奔入大清河而下與前年所查形勢迥別若當伏秋盛漲水勢卽由洪川口漫入趙王河倒漾沮河或由沮河

溢入濟河衝開民堰直注東南之牛頭河而南旺南陽昭陽等湖亦將以次受水是鄆城縣屬之沮河爲黃水漫溢東南必由之路而沮河頭之娘娘廟七里鋪王家垓車家樓梅家莊等處又爲河流趨注東南必由之路現在該處尙有民堰稍資抵禦亟須趕緊加築臣等現擬將沮河頭車家樓民堰堵塞並築做攔壩圈隄以爲層疊保障俾其東注趙王河倒漾之水得以匯流而北不致泛溢庶牛頭河一帶雖經伏秋大汛或可免漫淹之患而南昭等湖亦可因以保護免至受淤用濟漕船行駛又查鄆城屬之七里鋪地方民圩西臨沮河河岸舊堰已經伏秋汛水衝刷殘缺此處現無黃流混入尙係清水暢流北行匯注安山

但隄堰極形單薄臣等擬加築堅厚並加廂護埽以防盛

漲時黃水漫淹並免引黃趨向東南入湖之路又七里鋪

以南之八里河臨河民堰亦屬黃水倒趨沮河之徑臣等

擬加築內隄一段其七里鋪以北之王家垓亦擬添築大

壩一段均爲防淹民田暨障水漸趨東南灌湖阻遏運道

之路此數段工程較之築隄束水辦理稍有實際臣等再

四熟商意見相同已由臣寶楨飭委題補曹州府知府趙

新馳赴該處刻日購料興工趕爲督辦並添派委員會同

地方官督催民堰一律加修籌發銀兩核實撙節辦理以

防變遷而保南路運道至漕船將來經行之道自以張秋

八里廟口門等處爲要臣等復同至距張秋十里東阿縣

所屬之八里廟一帶運河口門勘得口門迤西淤灘現已涸露必須切去百餘丈深以見水爲度期使北注大清河之黃水與西岸牽平汛漲時得入運口浮送漕船又於滾水壩南首接續之程家灣民埝詢之土人僉稱前數年在巨浸之中衝刷殆盡此時惟有創築攔河大壩層土夯礮加廂護埽稍資得力但此處去冬水深尙三尺餘若須築做攔壩必於水底施工先將河水堵塞斷流始能舉事臣寶楨於會勘之下已派委陽穀縣知縣王亮采卽日親赴該處監督興工務將水底腳根立定速行加高加厚俾汛水由沙河南橋來時束歸沙河北橋入八里廟運口以濟漕行其壽張縣所屬之十里鋪以北姜家莊河身因黃水

偏注漸多涸露年來漕船到此俱係插標引導繞坡水行走仍應照辦其必應行酌挑者並飭王亮采及另派委員會同各地方官挑挖如式所用經費期無分毫浮冒其八里廟口門以內東阿縣所屬之運河至五里鋪等處以及至臨清之甄板閘各州縣應挑河道新淤亦經臣寶楨籌發經費飭交東昌府分發各屬督同趕辦至張秋八里廟以南河道亦經臣寶楨飭委運河道王化堂查明應繞湖者仍須插標引導繞湖行走應挑浚者趕卽擇要挑浚俾漕船到時可以乘汛北駛免致阻滯此臣等現在會勘辦理護運東水濬河利漕之實在情形也惟查黃流遷變靡常每出恆情意計之外臣等此時就目擊之地形水勢熟

籌審辦所費頗屬不貲實已竭盡愚忱期於各路兼顧然
伏秋大汛經臨情勢能否不再變更殊難預定惟有臨時
由臣寶楨就近隨時查看設法辦理總期本年漕運不誤
而於下游民田亦不至創深痛鉅一決不可收拾以仰副
我

聖主爲

國爲民之意

臣

兆棟於二十三日卽行起程沿途察看邳

宿運河情形趕回清江督辦兌運開行各事

臣

廷樾在濟

查閱營伍後亦卽回豫辦理桃汛防護事宜

臣

寶楨於二

十三日亦起程由戴村壩勘估各壩應修工段順道折回
省城以後如有必須會商之處

臣

等自當隨時往復函商

辦理所有臣等會勘築隄費鉅害重未敢率行並現辦束
水行漕各事宜謹合詞恭摺具陳伏乞

皇太后

皇上聖鑒訓示再此摺係臣寶楨主稿合併聲明謹
奏

滙陳官累請免扣坐支二成摺

同治十年四月二十九日

奏爲滙陳山東省官累情形籲懇

天恩將各州縣衛所坐支各款免其提扣二成開具清單
恭摺奏祈

聖鑒事竊維吏治之隆替視理財用人爲轉圜欲爲富庶
之謀宜先權出納之當山東素稱完善民間向無差徭一
切皆由官辦州縣之辦公則有地丁項下留支各款並得
挹注於漕官民相安上下交便承平日久東治漸墮道光
二十九年辦理清查遂查出州縣虧款一百三十餘萬兩
因議定於通省州縣留支項下每年酌提銀十萬兩以資
彌補咸豐四年裁省鋪司工食案內奉文分別有驛無驛

裁減八成六成咸豐八年接濟京饟案內奉文役食一項核減二成九年停給鈔票案內奉文一切雜支統扣二成役食又遞扣二成均先後遵辦在案查東省州縣留支項下如各役鋪司工食夫馬工料以及一切雜支等款共合銀三十二萬四千六百三十餘兩內酌提銀十萬兩又節次減成連減平併計約核扣銀十萬八千一百二兩零計扣去者三分之二留支者僅三分之一各州縣賠累孔多第以時值艱難不得不勉強支持共維大局行之數年究因應支者萬難節省仍須照數支發州縣苦累日甚一日報解寥寥同治三年經前撫臣閻敬銘飭司細查歷年酌提實數自道光二十九年秋季起至同治三年六月止實

祇提完銀五十一萬九千餘兩且尙有推展酌提年分接補軍需墊款之案前案未清後案又續州縣自知脫累無日疲玩成風百務廢弛虧挪日甚奏請停解酌提一款於是州縣稍輕一成之累累旣稍輕責成因隨之以重征解錢糧則立限催提不任絲毫蔽匿新舊交代則嚴辦二參不任藉詞延混督率司道府州守定成法相與警戒不稍動搖自同治三年五月以後截至上年年底止東省交代任清一任已無不結之案八九兩年錢糧除災緩外八年解到司庫銀二百二十萬九千八百三十七兩零九年解到司庫銀二百二十三萬六千二百一十三兩零均完足九分以上實爲二十年來所未有儻能逐年遞增漸至分

釐無欠豈不盡美盡善惟體察情形通籌終始竊恐有未能持久者蓋州縣爲萬事根本一州縣地方大則數百里小亦不下百里如緝捕盜賊拘提案犯催比錢糧護解餉鞘馳遞文報事事皆待人而理其留支各款均節奉裁定爲萬不可少之需而所以准其留支者正使之不窘於用防其廢弛並以杜其虧挪也一事有誤則處分隨之今歷奉核減扣去三分之一在州縣顧慮公事仍須照數支發支發之後又須補解此一分扣款從前州縣尙借助於漕餘自定章程分文不准浮取年來銀價日昂米價騰貴迥非前數年可比以漕辦漕且多形竭蹶特以功令森嚴各州縣於錢糧正款尙皆知儘收儘解不敢稍

有延誤惟留支項下扣成各款往往不能按期完解必待交卸晉省另行籌補其有存司領墊各款者則核入交代以領墊款項抵除如力難籌補又無領墊各款抵除則束手無策惟聽參辦此近來州縣苦累之情形也伏思辦事貴有變通立法宜期經久在咸豐年間辦理減成原因時事艱危力求撙節今南北軍務大定自應講求治安培養元氣必使人重犯法然後法可常存若於州縣留支之項常使其另籌歸補甚至束手待參是法已近玩久將弊生伏讀同治三年五月欽奉

批諭有云安民必先察吏欲卹民之疾苦先戒吏之貪欺而又必使爲廉吏者不致賠累俾中材皆知效法吏治方

克振興等因欽此仰見

聖明洞察激勵廉隅至意曷勝欽佩竊維

朝廷馭吏祇戒貪欺不使賠累東省吏治值此將興未替之時亟宜實力維持勿使廢墜茲既深悉州縣之累若不稍蘇其困誠恐弊竇旁生將法令亦有時而窮據藩司文彬具詳請將咸豐八年各役工食內核扣二成咸豐九年一切雜支統扣二成役食內又遞扣二成各案凡歸州縣留支之款自同治十年夏季爲始一律免其扣解准其留支仍照舊減平其由司道庫支放者依舊照章坐扣俾州縣無所藉口於地方公事不敢廢弛於征解錢糧不敢挪移其所裨益良非淺鮮並開具停扣各款項清單呈請具

奏前來臣覆加確核均係實在情形查東省度支專恃錢糧從前州縣率多征存不解任意虧挪以致司庫日空公用日絀自嚴辦交代以後均知挪移無可掩飾皆能自顧考成於征收時儘征儘解而藩司文彬復能實力催提精心綜覈閒有一二不知自愛者卽經隨時撤參近數年來司庫征收正賦已至二百二十餘萬之多實爲歷來所僅有現在撥解京協各饑及本省兵饑防饑需用煩多雖未能十分充足亦尙可藉資周轉此其明效大驗也而臣竊以爲尤可取者州縣報解較十數年前極爲踴躍而卸事時之交代多於初參力求結報卽有遲延亦皆不逾二參其間有於半年一奏案內或稱勒限完繳或稱飭查款

項者則以應解雜款各項爲之轉轄耳夫州縣應解雜款考之額例所定本屬無多似不難於清解何至因此轉轄究其所由實緣自咸豐八九年來額設坐支各款均令扣減報解一經短數卽應入雜列交與正款無異州縣以此有賠累之勢而又有難言之隱日甚一日困苦不支故不得不含混希冀稍緩須臾耳查額設坐支各款以夫馬工料役食爲大宗而廩貢糧銀雜支等項次之此款之設所以責州縣辦公也

國家二百年來額定之款各項所支率皆計日授食未嘗虧短今一旦扣減支給則必以不敷日食藉口誤公州縣恐其誤公仍須照數支給是以坐支有扣成之名而州縣

並無扣成之實既無扣成之實而又必責以解交成銀則有罄私橐以填公用圖稱貸以彌官項者是不惟無扣成之實而轉受扣成之苦所謂賠累蓋緣於此揆之於情實爲未協臣近年來嚴核交案每見州縣正款皆清而雜款則半多延欠其有領墊款可抵者則准之其無領墊款可抵者則追之屆期不清一例參辦雖迫於

功令之不得不然而問心殊多耿耿矣夫天下事利害之數每以相較而明而今昔之情亦以相形而見咸豐以前之山東地方均稱完善輸將亦極踴躍坐支各項又無分毫扣減之款且核之司庫錢糧歲入計不過一百五六十萬而州縣一經算交無不參虧之員今則地方擾攘已十

餘年百姓元氣未復坐支各項又復一再扣減至核之司庫錢糧歲入且至二百數十萬而州縣一經交卸無不結報之案是以今日之州縣較之昔日之州縣其因公賠累之實不待辨而自明矣臣竊謂東省公用不在零星之計較而在錢糧之盈虛果於糧賦一事精其考核杜其虧挪俾正賦無絲毫漏卮則所入者有常經而又於出納之餘撙節核實則所出者有限制自不患度支之不足至於州縣辦公之需仍照舊准其實支不必責以支後之補解使上下之際取與分明秩然不紊庶廉吏皆有以自立而不才者亦有所顧忌而不敢爲非所謂養其廉卽以去其貪捐其累卽以責其效於

國計民生吏治裨益實非淺鮮卽

臣

等現辦交代亦可期

相承於數十年後不至遽有變更更爲計之最得者也且
司道庫支放各款請免者祇州縣衛所之坐支項下應扣
二成其餘仍照章扣發在司庫所損無多而各屬有此調
劑更可責其激發天良益求清晰儻稍有含混者卽從嚴
立予參辦亦屬毫無愧心

臣

再四思維合無籲懇

天恩俯准自同治十年夏季爲始免扣州縣坐支等款二
成其減平一項仍舊照辦感戴實無暨極

臣

爲力清正款
永保交代起見謹繕應請免扣款目細數清單恭呈

御覽再從前扣過各款二成銀兩查有撥歸軍需者有核
入交代者並有業已參虧者積歲旣久頭緒紛繁容俟飭

司分案逐細查明另行造報合併陳明爲此恭摺具奏伏
乞

皇太后

皇上聖鑒訓示謹

奏

請在東省置買塋地片

同治十年四月二十九日

再定例官員於任所不得置買田地著

令綦嚴

臣

官東九載所有隨任之親屬丁口歲有喪亡本

年二月

臣

妻又復病故均尙未有葬地擬令

臣

子扶匱回

里而原籍貴州大定府平遠州久遭兵燹田廬蕩燬親族百無一存曩時煙火殷庶之區皆爲深林密箐目前情形回葬未易舉辦旅櫬纍纍於故鄉難遂首邱之私於異地仍不得片土之覆竊惟掩埋之典

聖世所重臣擬於濟南府東門外華山之麓置地十畝將妻及已故之親屬丁口暫行淺厝惟於定例未符敬懇情籲懇

高厚之仁施及枯朽 微臣銜結無以圖報除咨部外謹附片陳明伏乞

聖鑒謹

奏

整頓山東水師購造船礮摺

同治十年七月二十九日

奏爲酌擬整頓山東水師營務並籌款委員赴粵購造船礮開列條款恭摺具奏仰祈

聖鑒事竊照東省登萊一帶濱臨大海沿邊縣亘三千八百餘里地勢極形寥闊然其中港汊紛歧島嶼錯雜實爲南北扼要之區近年海運之漕船歲至通商之賈船日多一切緝捕巡防最關緊要

臣疊次欽奉

諭旨飭令認真整頓曷敢不竭慮殫思爲靖海安邊之計查東省現在情形海防之要倍於陸路而水師之練亦難於陸營

臣

年餘以來再三研究水師利病所在竊謂該營

夙弊首在於營制未善兵與船分而爲二而師船之不堅

礮械之不利與夫兵額徒多而口糧不足軍令不嚴而訓練無方又其顯而易見者也該營積弊既深自非僅建置一二員弁增減百十兵丁遂可謂之整頓必須將致弊之根源改絃更張方期漸有把握臣擬請先行委員赴粵購造拖繒船十四號並配齊洋礮軍械駕駛回東以立水師根本並飭委員在粵海等處選帶熟諳水性備弁數員及選募善於駕舟之舵工桅工泅水人等一併隨船來東以資教習並擬將該水師三營併爲二營於額兵一千三百一十一名內精挑強壯戰兵七百名守兵一百名優給口食以三百八十五名爲榮成水師營派分師船七號駐紮榮成縣之石島海口以四百一十五名爲登州水師營亦

派分師船七號駐紮登州府城外之天橋海口其餘兵丁卽分派防守各處礮臺營汛仍習水操並將文登及前後營名號裁去其三營官弁擬酌留原設副將一員遊擊二員守備三員千總三員把總六員外委七員額外外委七員以資應用其餘官兵悉予裁撤俾其人數少而口糧優訓練可專責成迨日久根本立定以後有事隨時增減應用庶可紓饑力而收實效至於水師營制其機宜本與陸路不同溯查舊章除每船准給舵工一名頭目六名之外其餘營制與陸路無別是以所用非所習所習非所用徒令月饟虛糜名爲水師而實不知水師之用甚至有船無人料理任其朽廢此卽臣所指兵與船分之大弊也今擬

請將水師另立營制設水師統領一員兩營營官二員兩營哨官十員兩營外委七員額外外委七員統領則以文登營副將充當營官則以前後兩營遊擊充當守備千把分帶各船爲哨官其船中舵工桅工以及一切水手皆以戰兵充當自營官下至兵丁均定制周年以船爲家不准上岸居住使兵不離船而練習日精船不離兵而廢爛可免庶幾循名責實始有裨益至該弁兵等旣責令周年在船練習卽與周年出哨無異所有口糧銀兩若照舊例支給實屬不敷養贍於操練仍無實濟擬請酌量加增俾其衣食有資無須別謀生理除把總以上例支俸廉等銀足敷辦公無庸酌增外其外委以下每員每月所得餉銀萬

不敷用擬請於額例應支俸廉薪蔬饌乾外酌量加增至
於舊額以及加增銀兩臣就現在挑留之官弁兵丁人數
核計每年約需俸廉饌乾米折等銀共三萬八千四百八
十餘兩較舊額每年需饌銀四萬一千七百餘兩計已節
省俸薪饌乾銀三千餘兩又其中裁去各兵省去兵米一
千五百餘石復節去銀一千五百餘兩是水師雖云增饌
實較舊例額支省去銀已及五千餘兩饌項既不加多而
各官弁兵丁均得實惠益形踴躍各專職守不准別計營
生久之練成勁旅八百人冀可敵千萬人之用似較之兵
多饌絀徒糜無補者得失固有在也營制既定口糧既足
臣當嚴申軍令明定規條督飭統領營官等日加訓練有

功則錄有過必懲不稍寬假並令將各礮臺擇要依法修築每年各按汛地認真巡哨務期日有起色臣謹就管見所及酌擬條款八條恭呈

御覽如蒙

俞允照行臣擬與藩司文彬籌措銀十萬兩遴委妥員赴粵先行購造船礮第司庫款項多係地丁錢糧每年供支京餼及各省營協餉已屬入不敷出若再籌此鉅款實覺無從設措臣通盤籌計擬請在於東海關常稅項下提銀四萬兩臨清關稅項下提銀六萬兩惟臨關連年水涸收數短絀一年萬難足數應請以兩年合計如兩年之內除提尙有長餘仍卽劃出解部至此項銀兩應請先由司庫

籌撥以期迅速隨後再以提項歸款庶免曠日需時再查
師船既須赴粵購造所有一切木料價值以及匠作工資
未能預計又海水素鹹船板最易浸壞此次必須格外加
厚並擬於船身及船內艙面另加鐵皮包裹一層俾資經
久其船中應配礮位亦擬在粵購造如此結實辦理恐經
費更覺加多現籌之款能否敷用尙難懸擬應俟造成後
照實用價值核實報銷至條款內所議各條俟礮船到日
試行一年後如有必須更改之處再當隨時悉心核議奏
明辦理其一切官弁兵丁等另議營制及應支舊額新加
各銀米細數亦俟奉

旨照准後再行另造詳細妥冊分咨戶兵兩部所有酌議

整頓東省水師條款並請籌議款項委員赴粵購造船礮
各緣由恭摺具奏伏乞

皇太后

皇上聖鑒勅部覈議施行謹

奏

謹將酌議整頓東省水師條款開列清單恭呈

御覽

一製造師船以立根本也水師有戰船猶陸路之有營壘陸路無營壘無以利戰攻水師無戰船兼且不能操演東省船制向有紅頭與趕繪二式類皆首尾大小均齊形製笨重加以趕繪船則船頭過高紅頭船則並無槳櫓海面均不適用道光二十九年東省舊船遭風擊碎始有雇募廣艇之議查廣艇本名拖繪船形勢與紅丹船相類其初創自粵東沿海漁戶用以捕魚官軍見其涉洋便利因配以大礮軍械在粵海緝捕頗著功效其後調赴江南勦賊扼守長江水師亦與有力

臣

徧詢熟諳水師之員僉云拖

繪船頭尖尾大利於乘風破浪且船身甚低無虞轟擊可施槳櫓河海皆宜師船之善似此較優此次擬請仍派員赴粵製造此號拖繪船共十四號內十二號各身長七丈六尺頭寬八尺中寬一丈六尺尾寬二丈中間艙深七尺五寸三桅大桅約高七丈六尺頭桅約高四丈九尺三桅約高三丈四尺舵一面約長二丈一尺寬八尺左右各八槳又二號身長九丈頭寬九尺中寬一丈八尺尾寬二丈二尺中間艙深九尺三桅大桅約高八丈二尺頭桅約高五丈二尺三桅約高三丈七尺舵一面約長二丈六尺寬九尺左右各十槳以上各船均帶隨船舳板一隻兼各備雙櫓爲趕程之用通身兩層板成造外層板厚八分內層

板厚二寸四分船身包裹鐵片一層艙面再加厚板一層亦包鐵葉一層以防震裂其帆纜錨碇皆預購二分以備更換餘如淡水櫃飛叉唧筒一切應用之物皆備辦齊全前項船隻卽責成督造之員認真妥辦務須工堅料實毋得一毫苟且俟造成抵東後卽分撥登州水師營六隻各編字號爲該營師船餘大船二號作爲統領戰船以備駐紮操防之用除造成照例飭取保固外每屆大小修及應行折造之年應俟船到後查看再行籌議奏咨辦理一精購礮械以資利用也水面交鋒戰船之外首資礮械此次整頓水師一切訓練技藝皆當精益求精不得仍前祇習虛套惟必先有利器然後可責成功水師皆在洋面

其所爲攻堅致遠擒斬制勝者全恃大礮至於刀牌槍矛則必須舍舟登岸追勦敗賊乃可得用茲擬每號拖繪船頭桅後配二千觔大礮一尊尾配五百觔大礮二尊兩旁配千觔大礮四尊二百觔礮四尊子母礮八尊敞口礮二尊每船共大小礮二十一尊皆用磨盤礮車以期靈動其統領船內惟頭桅後之大礮改用二千餘觔或三千觔者餘則大小盡同又每船應配鳥槍十二桿藤牌十四面牌刀十四口長矛十二桿以及竹帽四十五件統計拖繪船十四號應用大小礮位二百九十四尊鳥槍一百六十八桿藤牌一百九十六面牌刀一百九十六口長矛一百六十八桿竹帽六百三十件以上槍礮自以外洋精製者爲

佳應請不惜重價責成造船委員認真採辦其藤牌刀矛
呂網等物粵東所造最爲精良應飭一併配齊回東其一
切火器祇須訪求善式由營自行加工製造至火藥礮子
二種在軍中尤爲緊要之物應責成該營統領督同營官
等加工監製不准草率務使火器各項漸就精良以收實
用至於沿海礮臺島岸水城等處應用大礮及防守各礮
臺營汛兵丁應用之鳥槍軍械等物應俟查明該水師營
現存礮械數目分別可否應用然後酌量補購以節糜費
而昭周密

一裁併兵額以收實效也溯查登州水師舊隸登州陸路
總兵所轄康熙四十三年添設前後兩營額兵一千二百

名五十三年裁後營道光二十三年防洋善後案內復添
後營三十年前任撫臣陳璘偕於遵

旨籌議海防案內奏准將登州鎮改爲水師兼陸路並將
該鎮所轄之陸路文登協副將亦改爲水師抽裁該鎮陸
路兵丁添設文登水師營現在核計文登協額設副將一
員守備一員千總一員外委四員額外外委四員戰兵三
百九十名守兵九十六名前營額設遊擊一員守備一員
千總一員把總二員外委四員額外外委二員戰兵三百
一十名守兵二十八名後營額設遊擊一員守備一員千
總一員把總三員外委五員額外外委五員戰兵四百四
名守兵八十三名共計水師官三十九員兵丁一千三百

一十一名人數雖多然卒不得一兵之用前歲臣飭將老弱刪汰因無船訓練尙未募補今若必復一千三百餘名之舊額卽使額饒足數而爲數過少不足以養其身又安能以束其心徒使人數多而饒項虛糜綠營之弊大率在是臣再四籌思與其增兵缺饒而徒募虛名不若裁兵併饒而胥歸實用擬請於原額一千三百一十一名內酌留戰兵七百名守兵一百名分爲兩營以戰兵三百六十五名守兵五十名爲登州水師營以戰兵三百三十五名守兵五十名爲榮成水師營其餘五百一十一名暫行裁撤卽以裁贖之兵饒加作現兵之口糧俾其足敷養贍無以藉口然後責之以勤操彼既有所利而樂爲我亦有所恃

以行法此練兵之大要也至於以兵配船計登州共派師船六號統領戰船一號每號應配兵四十五名共戰兵三百一十五名其餘戰兵五十名守兵五十名分派防守水城島岸各處礮臺各項差使之用榮成共派師船六號統領戰船一號每號應配兵四十五名共戰兵三百一十五名所餘七十名內以戰兵十名守兵四十名分駐膠州作爲哨探之兵以戰兵十名守兵十名留於該營以爲防守臺臺各項差使之用至該營水師官弁以文登副將爲統領督駕戰船二號更番駐紮於登萊兩處以便督操其登州水師營則以原設之後營遊擊作爲營官督駕師船一號並以守備一員千總一員把總三員各管駕師船一號

作爲哨官榮成水師營則以原設之前營遊擊作爲營官督駕師船一號並以守備一員千總一員把總三員各管駕師船一號作爲哨官其後營原設之外委五員酌留三員裁去二員額外外委五員酌留三員裁去二員額外外委二員前營原設之外委四員酌留二員裁去二員額外外委二員全行酌留至文登營額設守備一員千總一員應留作爲統領兩號師船哨官之用並酌留額設外委二員額外外委二員其餘原設之外委二員額外外委二員亦行裁去其所留外委額外外委十四員除分帶師船外應由統領酌派外委額外外委各一員管帶哨探兵丁分舢板二號駐紮膠州其餘各員並分派帶兵防守扼要之島岸礮臺及在

船聽候調遣仍令日習水操不得徒事株守又該三營既併爲二營所有文登水師營及前後營各名目卽行裁去惟文登協副將以水師兼管陸路之處仍毋庸議改俾其於操練之暇兼顧陸路至該三營各兵共計應裁去戰兵四百零四名守兵一百一十七名通共去額兵五百二十一名其何營可裁可留若干刻下尙未據委員點驗未能預計應俟欽奉

諭旨照行後臣再行遴員前往會同該營鎮將詳加點視考驗分別應留應裁實數再行奏咨存案如此核實辦理庶幾兵歸實用而饒不虛糜矣

一改定營制以除夙弊也查用兵之道選將爲先而在水

師尤爲要務從前撫臣陳慶偕請將登州鎮改爲水師兼陸路者亦爲慎重水師起見惟臣細查海疆情形寥闊異常而登鎮所管東三府陸路地面周圍亦不下二三千里地勢旣廣稽查匪易且水師陸營用各不同卽操練一切迥異總兵能習水師者必不長於陸師習陸師者必不精於水師一定之理今若以一人兼管水陸必有得此失彼之慮臣現擬將此次所辦水師定爲專汛統領一員卽以文登協副將充當其官銜則爲統領登州榮成水師兩營副將易去文登水師名目復設營官二員登州水師一營卽以登州原設後營遊擊充當其官銜則爲管帶登州水師營遊擊榮成水師一營卽以前營原設遊擊充當其官

銜則爲管帶榮成水師營遊擊守備千把等官歸登州水師者其官銜則爲分帶登州水師營兵船守備千總把總歸榮成水師者其官銜則爲分帶榮成水師營兵船守備千總把總至歸入統領管帶兵船之守備一員千總一員其官銜則爲登榮水師協管帶兵船守備千總又酌留外委七員應分入登州水師營四員榮成水師三員額外外委亦照此分入其官銜歸登州者則爲登州水師營分防外委額外外委分入榮成者則爲榮成水師營分防外委額外外委至該兩營水師應改歸巡撫自行統轄其統領以下各官仍由巡撫專揀精習水師之員專案奏咨先行試署俟一年之後查明實能得力再行請補如此定立營

制或不致復蹈舊習至現在之副將遊擊以下各員如係實缺應俟奉

旨准行後由臣詳加察看如果能勝任卽照依奏咨充當如該員弁等有不能精習水師者應請改歸登州陸營以原品原銜改補其裁去之署事候補各員弁等亦請改歸登州陸營差遣候補俾免向隅至水師制勝之具在於船堅礮利而能用船礮者首在乎舵工得人南省舵工之良者俗又謂之駕長上能測驗雲氣以防風雨下能熟習海道以避沙石中能計大礮致遠之里數而運掉船隻以操其命中之權故海上交鋒不特一船之人皆依以爲命卽爲將領者亦與之商推攻守之宜以爲進退其所繫之重

如此舵工之次則有桅工又名班手平時用以登高瞭望整理篷索遇敵則攜礮緣升桅頂斗上發礮及拋擲火罐以焚擊敵船非狻捷而有膽者不足以膺斯選以上二項皆師船之頭目如勇營之有哨官隊長一人而兼數人之口糧者也又其次則有大線工大礮手副舵工副桅工礮手刀牌手長矛手探水頭旋木匠隨船舳板工等項名目其槳櫓手則以槍礮刀矛等手兼管一船之人莫不各有兼長之技蓋由其平日以船爲家日久練習無稍閒斷同船之人亦情意相洽無彼我之分故遇敵能各自爲戰又能聯爲一氣也查東省水師舊章每營祇分弓箭藤牌鳥槍礮手四項兵各若干名並云舵工號令均在其內而已

臣細加考核不特舵工非該營兵丁所能充當卽各項水手亦皆由臨時雇募至桅工之用則營中絕無知之者蓋因舵工頭目每年例定工食祇有數金人以其不敷餬口遂皆不願充當而每年由外籌給之津貼巡洋經費亦不敷長年雇價之用是以該營每屆巡洋之期多雇近海漁戶爲之而配以兵丁出哨兵丁旣非素習風濤一出大洋每多昏暈顛仆不能施放槍礮漁戶則以賤值受雇賞罰之所不及更不肯捨身禦賊是以不能得力甚至捏報出洋以圖塞責及回哨則漁戶受值歸家兵丁亦陸居散處卽有師船無人料理徒任其朽壞於荒沙僻島之間臣查閱舊卷見東省水師屢次失事推原其故一由師船廢擱

日久船身圯裂稍遇風浪卽成散渙一由兵丁旣未練習出洋水手更屬不關痛癢故一遇賊卽棄船逃走水師廢弛至於此極茲欲痛革其弊非合兵丁與駕船之人爲一而責令終年在船習練不可查水兵之於駕船猶騎兵之於乘馬未聞陸營於騎兵之外別設馬夫則水師亦不得於戰船之中另添水手然而人皆願爲馬兵而獨恥爲水手者則以陸營之制馬兵之口糧較優又守兵必須拔補馬兵然後能遞升外委千把以至將領故人人以馬兵爲行伍出身之途而欲得之至水師之舵工頭目人等工食旣非優厚又無進身之階故不特南來之善工不肯應募卽本營之戰兵亦不願兼充也此次整頓水師擬請於每

號拖梢船內各設舵長一名副舵長一名桅長一名副桅長一名大線兵二名頭線兵二名大礮兵二十名礮兵十五名探水兵一名木匠兵一名計每船四十五名皆以戰兵充當不准一名臨時雇募其線兵大礮兵均令兼習刀牌長矛礮兵鳥槍探水兵木匠兵二項共兼管頭舵及隨船舳板並刪除舵工桅工某手等項名目改爲舵長桅長某兵行船時除舵長桅長線兵各有專司外餘人均令兼習張帆起錨掉槳搖櫓等事更番出力以均勞逸平日分派次序不許臨時推諉並請援照陸營馬兵拔補額外外委及水師營守備越級升補遊擊遊擊越級升補副將之例准將拖梢船之舵長桅長由臣考驗擇其技藝精熟者

舵長則越級以經制外委記名俟其試驗一年之後如果勤奮遇有經制外委缺出准其與應升應補人員相間拔補桅長則以額額外委記名亦俟一年試驗期滿其勤奮者遇有額額外委缺出准其考取拔補補缺之後或一時無人可以替充舵長桅長則仍令其人以本職兼充准其兼領本職俸薪等銀及舵桅長口糧以資熟手而示鼓勵其舵長桅長缺出以副舵長副桅長分別考較充補儻其人不能諳練或有別故則在各項戰兵之內秉公考取練習各事能勝舵長桅長之任者令其充補如本營實在無人堪以充當然後准其在外招募此項外募之人應俟兩年試驗期滿方准考拔外委及額額外委之缺至練兵大

礮兵以下各戰兵均照陸路馬兵拔補額外外委之例較論勞績技藝以爲拔補次序之先後其勞績技藝相等者則以入營月日之先後爲次序其守兵拔補戰兵亦與陸營相同如此明定章程使兵丁與駕船之人合而爲一而又有出身之途庶可以資奮興而收實效至舊章弓箭兵一項在陸路固爲制勝長技然施之師船風浪顛簸之中誠恐箭射無準徒具虛名無裨實用應請刪除並請每營祇定以戰兵守兵額數毋庸分別大礮鳥槍刀牌長矛每項各若干名俾得互相練習各有兼長且因一船之人數有限不敷逐項分派兼以杜其臨事互相推諉也此節於舊章多有變通而於水師則可期整頓固未可憚更張之

煩而仍蹈因循之習也

一申嚴軍令以精訓練也自古大將之能驅千萬人於鋒鏑之中而得其死力者恃有賞罰而已信賞必罰雖市人可驅之使戰若賞罰不用雖有節制之師亦無能爲役軍興以來勇丁皆募自閭閻非所謂市人乎緣營兵丁受

國家二百餘年豢養之恩非所謂節制之師乎然而勇丁每所向有功緣營則罕聞制勝豈兵果不良於勇哉亦以賞罰之權有行有不行耳查勇丁口糧每月支銀三兩數錢不等兵丁以水師而論戰兵每月支銀一兩五錢守兵每月支銀一兩在勇丁則衣食有餘在兵丁則飢寒不免是勇營之賞行而緣營不行也勇丁違犯軍令營官得以

軍法從事而綠營則笞杖動拘文法未聞敢有斬一兵以肅軍令者是勇營之罰行而綠營不行也此次辦理水師自應嚴定賞罰以期整肅除口糧一節另款籌議外應請申明軍令其水師營自外委以至兵丁如有抗違軍令情節較重者均於審實後准統領官隨時稟知到臣就營軍法從事其餘尋常事犯及千總以上各官有犯除應棍責及插箭遊營仍准統領官專決外至犯該徒流以上仍照例稟報臣衙門聽候核辦不得擅專至成營之初首應料簡精良除原營各兵已由臣嚴加刪汰外此次仍派委大員會同統領官督同營哨將現有之兵逐一點視考驗如有疲玩不堪教練者悉數開除其餘年力材具尙堪造就

者准其留營學習以示體恤舊兵之意其不足之數卽在
東省沿海招募熟習水性之人充補不論新舊兵丁皆取
具年貌籍貫保人存案並須一律挑選年力少壯之人不
准一名徇濫又水師兵丁從前本無訓練之方自師船廢
壞益以荒疏此次新船到東駕駛萬難得力相應請援照
道光三十年前撫臣陳慶偕奏案准令督造師船委員在

粵海等處選募熟習水師備弁數員並酌帶舵工桅工線
手礮手及善於泅水精製火器之人十數名隨船駕駛來
東以資教習此項備弁亦援照奏案遇有水師應拔之缺
准其與東省備弁一體考拔其原有大銜者並准其照長
江水師之例借補小銜至舵工桅工二項卽照前條所議

俟試驗一年然後准其拔補外委及額外外委之缺其繚
手以下卽補戰兵如此辦理旣可使合營有所效法亦免
往返資送之煩一俟新船抵東所有新舊各弁兵卽按定
各項職役日夜在船練習自營官下至兵丁皆不准一日
離船陸居至於訓練之法舵長副舵長則練習測驗風雨
熟記沙石運掉船隻講求礮法等事桅長副桅長則練習
攜礮升桅焚擊敵船等事繚兵則練習風信專司篷索泊
船時仍以二人兼習刀牌二人兼習長矛其管五百觔以
上礮位者謂之大礮兵內一半兼習刀牌一半兼習長矛
二百觔以下礮位者謂之礮兵均兼習鳥槍計大礮二千
觔以上者四人共管一尊千觔以上者三人共管一尊五

百觔以上者二人共管一尊二百觔以下者一人各管一尊至於子母等礮則一人可以兼管兩尊凡派定專管某礮之兵務令各精其業不得時常更易至每日操練礮位後則專令精練泗水之技日以爲常每月由統領閱操一次每年回哨之後復將兩營合操一次俾不致有參差且可隨時勸懲至礮兵操練靶之法有三一以陸路打陸路之靶凡礮臺之下臨陸營設爲發礮遇敵者是也此等靶其形制雖與尋常者無異然必須隨地勢之高下遠近量礮位之大小一一立靶試放有準使敵人不能薄我礮臺斯爲得力不准祇圖倖中致成虛套一以水路打水路之靶凡師船設爲彼此紮營不動而交戰者又設爲我軍紮

營而禦敵船之乘閒劫營者又設爲彼此駕駛而練習迎擊追擊之法者皆是也此等靶卽與常靶不同應以破船爲之或用木筏加以篷板作爲敵船緊要處所及人立之地以爲標準此筏或繫一處或放中流師船則時而聯踪排擊時而單舸追逐務於出沒風濤之際施放槍礮猶能有準乃盡練習之功至此時操練舵長則視其運掉之功繚兵則視其操縱之力桅長則視其騰躍焚擊之奇泗水則視其潛伏浮沈之巧此誠水操之至要者也一以陸路而打水路之靶凡臨水礮臺設爲飛擊敵船之駛來相攻及遙繫水管相困皆是也此靶亦以木筏象敵船之形大致與水路打水路之靶相同而穩便過之蓋礮臺之設多

於水道扼要之區沙綫灣環敵船不能頃刻驟至在我可以從容命中其穩便一也有堅厚牆垣相蔽礮子不能穿洞火箭不能焚燬其穩便二也足踏實地非如戰船之上下顛簸則發礮尤易有準其穩便三也此次訓練弁兵應剴切申諭使之各明紀律有過必懲庶一切練習打靶之事不敢不力求精熟以上訓練之法不外乎此至於相機調度出奇制勝則在乎臨敵制宜又非可以成格局矣一酌增口糧以恤兵艱也水師弁兵出洋巡哨日冒風濤之險動與性命相連與陸營兵勇平居無事者甘苦迥異且令其終年在船亦與陸兵練習之後即可回家別謀生計者不同若非口糧稍加優厚不足以示體恤而昭激勸

查水師定例副將每員每月支俸銀四兩四錢五分五釐
薪蔬等銀二十七兩又每年應支養廉銀八百兩遊擊每
員每月支俸銀三兩二錢七分八釐薪蔬銀十六兩又每
年應支養廉銀四百兩守備每員每月支俸銀一兩五錢
五分九釐薪蔬等銀六兩又每年應支養廉銀二百兩千
總每員每月支俸銀一兩二錢四分七釐薪銀二兩七錢
五分三釐又每年應支養廉銀一百二十兩把總每員每
月支俸銀一兩三分九釐薪銀一兩九錢六分一釐又每
年應支養廉銀九十兩外委每員每月支俸銀一兩五錢
米三倉斗又每年應支養廉銀十八兩額外外委戰兵每
名每月支饌銀一兩五錢米三倉斗守兵每名每月支饌

銀一兩每例馬一匹月支乾銀九錢以上皆大建月核算者自把總以上每員月扣朋銀二錢外委額外外委戰兵每名月扣朋銀五分守兵每名月扣朋銀三分又把總以上閏月其俸薪養廉等銀例不加增外委額外外委戰兵守兵遇閏月其銀米仍照例加增此水師餉銀之定額也自把總以上各官其俸薪養廉全數支領足敷辦公之用惟外委每月連養廉核算祇得銀三兩除扣朋銀五分所得尙不及一名勇丁口糧之數至額外外委戰兵二項每月除扣朋銀祇得銀一兩四錢五分守兵每月除扣朋銀祇得銀九錢七分無論不能養贍家口卽一身衣履之需亦無所出一經入伍又不能別謀生計其困苦情形殊堪

憫惻從前弁兵巡洋雖准於例餼之外籌款量加津貼然爲數無多且除出哨方准支領回哨卽行停止今旣責成該弁兵等周年在船練習卽與周年出哨無異自應酌加長年口糧以資食用除把總以上各員仍照舊例支領毋庸酌增外擬請外委每員每月酌加津貼口糧銀三兩額外外委戰兵每名每月酌加津貼口糧銀一兩五錢守兵每名每月酌加津貼口糧銀五錢以上弁兵仍准其支領舊例應得之餼銀米折至戰兵內之充當舵長桅長者仿照礮船章程舵長每名每月支給口糧銀六兩桅長每名每月支給口糧銀四兩五錢副舵長副桅長每名每月支給口糧銀三兩九錢以上四項其本身所充之戰兵口糧

卽在數內仍照戰兵每名每月支給例定米折銀兩各弁兵等新增之銀米遇閏月應照正饌之例加增其應扣朋銀及遇小建月應扣銀米等款仍照舊章核扣此外舊設之公費雜支亦仍照給惟紅白賞卹等款旣經酌給津貼應行裁去以昭簡易至該營額設例馬准其酌留三十匹惟馬匹原非該營急需其饌乾應仍照舊支給不必加增所有新增之饌請卽在裁賸各兵一切饌項內估計支銷毋須再籌別款以期經久至此項酌增口糧係爲水師終年在船操練與陸營安坐謀生者不同他營弁兵自不得援以藉口如此則兵丁衣食有賴不另營生必可專心致志勤其職業日久自能精練踴躍倍常庶數十年水師之

廢墜或冀從此奮興而緩急差有可恃矣

一修築礮臺以嚴守衛也登州海道南北綿亘三千八百餘里內有海口三十餘處島嶼八十餘處從前曾有扼要處所如蓬萊縣所屬之水城天橋口西山黃縣所屬之黃河營妃嶼島文登縣所屬之馬頭嘴五壘島祭祀島榮成縣所屬之石島口養漁池龍口崖海陽縣所屬之黃島嘴丁字嘴等處築建礮臺十三座又於各縣之次要島岸築有塹臺五十六座星羅碁布頗爲周密無如日久失修每多坍塌兼之係用輒石所築未能合法終恐難資捍衛

上年查閱海口具悉形勢擬請俟營制既定之後由

臣行

令該鎮道等再加踏勘擇其至要者籌款重新修築其不

甚緊要者暫緩修理既可節省經費亦免兵分力薄防不勝防之弊其修築之法擬改爲以三合土築成圓臺每臺築牆垣二層務令堅厚一概不用甌石免受礮子推擊之患其臺頂亦圓而下垂臺下環以深壕使礮子到頂皆順其勢墜入壕中並可防敵人開挖地道又臺中應開鑿池井蓄水並預籌藏儲火藥薪糧之處臺下亦暗掘地道或數里許爲出入致勝之用築成之後設立水陸二靶將臺中礮位逐一試驗有準並令統領各官督率師船至臺下互演攻守之法務期計出萬全毋使臨事周章至此項工程從前未經辦有成案其每臺需用銀數無從懸擬應俟詳細勘估之後再行奏明籌款興辦

一歸併汛地以厚兵力也查舊章水師各營所分汛地前營所轄自江南交界之鷹游門起至文登營交界之馬頭觜止計洋面一千六百八十里文登營所轄自前營交界之馬頭觜起繞過成山至後營交界之芝罘島止計洋面八百七十里後營所轄自文登營交界之芝罘島起至直隸之大沽河交界止洋面七百二十里又北至北城隍島迤北至奉天之旅順營交界止洋面三百三十里共計洋面一千九百二十里前營共分二汛文登營共分三汛後營共分四汛以千總把總爲專巡守備爲分巡遊擊副將爲總巡總兵爲統巡遇有事故指明島嶼以專責成每年會哨並於交界處所報明地方文武互相結報以上各節

立例似爲周密然臣核實籌思其弊有三蓋各營旣分汛地勢必各給師船方能責其守禦然以現在之師船十四號而分紮各汛平時旣不能合操有事又猝難調集徒使兵分力薄終致不得一船之用其弊一也分汛旣多則交界之處亦多遇有事故彼此易生推諉雖有指明島嶼之條而海道渺茫事生倉卒亦未易確分疆界其弊二也行軍之法爲將領者必當身先士卒然後能責弁兵之奮勇向前今以海疆要地軍務重情乃僅以千把微員當專巡之任不特不足以資鎮壓且恐該將弁等自恃諉過有人遂周年安坐衙齋不敢出洋冒險是設此例徒爲該將備等遇有失事處分避重就輕之地實無益於營務其弊三

也此次整頓水師凡事皆力求實際則此條亦應另議查
防守最期扼要而兵合乃能力專臣擬請將師船十四號
分爲兩枝每枝各分師船七號一枝駐紮榮成縣屬之石
島海口卽名爲榮成水師營一枝駐紮登州府城外之天
橋口卽名爲登州水師營並將舊名前後營字樣裁去此
二處在海口中最爲衝要之區上下扼紮則各處要口足
資控制毋庸多分兵力致形單薄每年仍照舊三月出哨
九月回哨一可履涉大洋熟習風浪一可明悉沙綫臨時
制敵至出哨師船之數每年每營應以三號出巡三號留
操以備緩急由該營遊擊派出報明查考其兩營遊擊守
備亦一律分年出巡如此營以遊擊出巡守備留操則彼

營以守備出巡遊擊留操遇有賊匪准將留操之船酌調前往協同緝捕年終儻有失事惟該兩營遊擊是問所有舊章專巡總巡各名目一概刪除以歸簡易而昭核實其總巡戰船二號亦令分年出巡以資鎮壓並稽查兩路師船勤惰如此則三千八百餘里之洋面聲勢可期聯絡而海疆庶不致漫無防範矣其餘未盡事宜統俟奉

旨允准後由臣督同藩臬兩司及登州鎮道悉心核議再行分別奏咨辦理

預籌海防情形片

同治十年七月三十日

再東省水師從前未有夷務之時僅以護送行旅嚴防盜賊情形尙緩今則夷務方殷水師實第一切務然臣竊謂水師之得力者仍恃以爲沿海陸路之聲援而非必與洋人爭戰於大洋也蓋我之土地人民貨財皆在內地而不在大洋卽洋人此時之所以矜奇炫異於洋面者亦以現在彼此相安藉爲往來通商之路若一旦有事彼必與我爭陸地而決不與我爭大洋此情勢之必然者矣臣年餘以來以洋人現在之用心揣其日後之譎計如事機稍有不順天津則其必爭以爲要挾之地上海則其必據以爲根本之圖而其中閒寄頓糧草轉運煤水緩急可便於接

濟者則必在山東夫山東當有事之時凡沿海邊界以及
島嶼居民皆當徙置內地居民既已遷徙則糧食財物隨
之而徙其不能與之俱徙者則房屋林木井泉之類然亦
必盡焚燒填塞不使稍有留餘以贖寇糧此時所謂大洋
者除煙水茫茫之外所有皆窮沙荒島洋人亦何所圖既
無所圖則必將棄之而與我爭城池矣彼與我爭城池則
其開花炸礮誠爲利器我外無以與之牽制而任其泊近
內洋日事轟擊雖善守者不爲功是必有得力水師以與
之駛逐於近城數十里之洋面使彼不能泊近內洋縱其
槍礮精良亦不能遠在數十里之外攻我城池而水師倚
附城垣卽可以互相策應不致孤軍受敵我之水陸互爲

聲援則洋人內不得近城外無所擄掠必成坐困之勢此
臣所謂水師仍恃爲沿海陸路之屏蔽而非與洋人爭戰
於大洋者也至於山東形勢沿海雖有八百餘里而其中
城池之近海者惟登州府城與文登甯海榮成數處餘則
相距海邊或一二百里或數十里不等且皆港汊紛歧紆
曲淺塞不通大舟其水道亦爲洋人素所不習縱其時窮
而鋌走不可不慮然彼固恃船爲憑依若一經遠歷陸道
則失所憑依而勞逸主客之形制之亦易爲力臣竊計有
事之時洋人與我爭城池必致力於登州蓋登州爲煙火
繁盛之地得之則後路之食物易通且爲南北扼要之區
得之則津海之咽喉可塞是洋人之注意者在此卽我之

所必爭者在此况登州府城洋面之長山島廟島等處距城僅四十餘里而長山廟島以內水深者不過一二丈淺者或僅數尺若令洋人泊近該島而以小舟載礮攻城則彼之洋礮可以遠擊二十里之內而我守城之礮斷不能遠及二十里之外即使我之礮能遠及而彼攻我城較之我攻彼舟其得勢固在彼而不在我矣故必有水師於近城內洋與之角逐然後可得而守也至登州城爲天津門戶而榮成則爲登州藩籬蓋榮成切近成山勢本天險此處駐一水師則洋船自南而北可以首先防禦而登州繼之卽洋船繞越榮成窺伺登州則榮成可以躡其後路登州水師禦之於前榮成水師躡之於後使彼不得志於登

州斷不能遽窺天津臣現籌登州與榮成分駐水師各一營者用意卽在於此顧或者曰洋人所用者輪船其堅厚便捷風濤皆利今以艇船與之角勝勢必不能臣竊計洋人之用輪船也本以爲載貨通商取其載多而行速可以獨網厚利若兵船恐未必皆用輪船卽使用輪船亦不過調用時取其載多行速若實當攻戰之際亦未必用臣且以常理測之大凡兩軍交戰必須列陣陣勢立定然後槍礮可以命中進退可以自如彼洋船行駛大洋瞬息可十餘里誠不便與人接戰卽云洋礮極精可以致遠然亦必須船定而後礮能取中若船駛而用礮則礮必無準而又安能勝敵又况輪船雖大其在外洋亦頗顛簸蕩漾夫施

放大礮眼光手法稍不畫一則差之毫釐謬以千里洋人之礮速則誠速然必不能於手眼之外更有制勝絕技也且輪船利於大洋遇淺則擱當有事之時我旣無所顧惜於大洋固無所用其輪船而洋人與我爭持於內地亦必易輪船而用剝船彼旣易用剝船則與我之艇船相等此中勝負之機又決於員弁兵丁之有無膽氣與夫平日技藝之是否精練固不盡在船之堅捷否也臣現定練水師之法期於專習打靶精練泗水之技者意實在此至於臨時用事卽艇船尙嫌其笨擬參用舢板以期愈小愈靈卽曲港窄流皆可來去以盡多方牽制之術似與造用輪船各有得力至於東省洋面之大八百水師實不足以敷展

布然此時係暗爲預備非旦夕所急需若遽用多人餽項
無出且人多則約束稽查難周操練必不能精細臣現籌
以八百人分營訓練期於耳目易周練習無所掩飾至練
成勁旅之後一旦有事則招募沿海精壯漁人熟悉水性
以此兩營領之雖頃刻成營稍加訓練即可收指臂之益
而餽項亦不至於煩費此臣所謂先立根本之意抑核實
之一道也伏以海防爲

國家最要之圖旣籌預備之方非徒敷衍於目前必將深
謀夫久遠臣知識愚昧僅就管見所及彼此參觀悉心計
議是否有當謹附片密陳伏乞

聖鑒訓示謹

奏

密保京外各員片

同治十年八月初一日

再東省切近

畿疆海防情形最關緊要

臣

籌辦師船亟欲規久大之計

而惴惴焉惟懼弗及固不慮兵饟之難籌而深憂人才之不易也蓋事之極關重大者非真得強毅任事之人規畫其閒雖有善法非以敷衍壞之卽以遷就失之迨至事機迫切貽誤曷可勝言臣念及此寢饋難安自籌計水師以來於素所見聞各員留心諮考或吏治足信而謀略非其所長或智計頗優而心地終鮮踏實求其真能任事者未易其選惟查有現任藩司文彬氣局開爽剛健樸誠臣前特保之充派曹濟道長庚謀勇兼優膽氣絕倫此二員者

緩急足恃實爲東省不可少之人此外有候補知府薛福成純粹果確志趣超邁在知府中極爲傑出外省則有貴州候補道吳德溥心術正大貞固不搖臣前在黔時與之辦賊深服其馭軍撫民條理精密而海疆情形亦頗周知又刑部郎中文天駿留心時務沈摯開通若使歷練外事亦近時難得之才以上如薛福成吳德溥二員於山東沿海道府要缺洵能幹濟艱難如蒙

簡用必能不負任使至文天駿一員可否

飭發山東先行差遣俾其練習邊防究心外事俟一二年查其才真有爲再行奏請

錄用臣爲東省屏蔽

京畿當此時勢需人儲才最急既確有所知不敢不據實
上聞敬備

採擇謹附片密陳伏乞

聖鑒訓示謹

奏

黃水衝缺侯家林民堰請截漕備賑摺

同治十年九月十一日

奏爲黃水由沮河東岸侯家林地方衝缺民堰漫水東趨被淹較遠現已籌款先行撫恤並請分別截留曹濟等屬漕糧就近備賑咨會河

臣

勘辦堵缺築隄事宜恭摺馳陳

仰祈

聖鑒事竊

臣

接據署鄆城縣知縣鄭紀略稟報黃水於八

月初七日由該縣東南沮河東岸侯家林衝缺民堰漫水下注並據汶上嘉祥濟甯各州縣先後稟報黃水於十一日由南旺湖西北湖隄缺處灌入湖內並由各該境之趙王牛頭等河漸趨東南下游歸入南陽湖各等情

臣

當卽

派委候補道潘駿文前赴該處決口及漫水所至查看情

形並因被淹州縣地畝較寬晚禾及豆甫經登場勢必遷移不及一面行司籌款委員分發各屬先行擇要撫恤毋令災黎失所去後茲據潘駿文查得此股黃水係由鄆城西南趙王河東岸紅川迤北缺口正溜之分支衝缺縣城東南侯家林民堰現在決口約寬八九十丈水深約二丈餘沮河正身尙未斷流其由縣城西北匯入沮河之旁流均各如故至漫水下注鄆汝兩境均屬較重嘉祥濟甯以次稍輕近口門之數十里皆係黃水漸遠則已澄清其灌入湖河者尙係清水等語

臣查黃水自衝缺趙王河東岸頻年溜勢日趨東南緊逼沮河東岸向北奔注情形本覺喫重本年正月經臣會同河臣漕臣於覆奏會勘張秋築

隄束水摺內因沮河爲運西屏蔽請將沮河頭八里河七里鋪王家垓等處築做埽壩圈堰以爲保護運道之計復經札飭鄆城縣勸諭附近居民於此四處要工之外將沮河東岸一律築做民堰以助防範嗣經伏汛經臨雖疊見險工均得搶護平穩乃自八月初秋汛異漲卽張秋運口業已淤阻水勢復行暢注將鉛棧重船回空漕船全行浮送過境實爲數年來所未有而上游沮河之水亦復拍岸盈隄經印委各員勸督民夫分投搶堵無如水勢有長無消民堰究形單薄竟於七里鋪以南之侯家林衝成分溜決口漫水東注下游溢入湖河其各州縣被水之區情形亦復較重復思災民之田廬旣經漂沒資糧悉已無存蕩

析離居極爲可憫目前雖經籌款撫恤不過一時濟急之計瞬屆隆冬棲身無所餬口無資曹屬民情素多頑悍困苦情形更屬不堪設想卽使籌款散賑而一片汪洋貧戶復何從覓炊爨之資臣再四思維與其散給銀錢似不若隨處煮賑之爲得而煮賑所需之米又不若就近截漕之爲便查曹州各屬除濮范觀朝四州縣界在河北不計外擬請將曹屬之荷澤曹單定陶城武鉅野鄆城七縣濟甯州並所屬之金鄉嘉祥魚臺三縣兗州屬之汶上一縣泰安屬之東平一州共計十三州縣應徵起運漕米四萬三千數百石將來除緩實不過三萬數千石擬卽截留均就各屬相近之區撥賑各境極貧之戶令擇各鄉適中之地

分設粥廠俾老弱窮黎就近得以領食仍嚴定稽核章程
遴委妥員慎選公正紳耆隨同經理不准假手胥吏以期
實惠均霑災區稍得補救用仰副

聖主軫恤災黎之至意一俟戶口查明再行確核米數以
定散放日期之多寡儻有不敷仍當由司庫酌量撥放以
資接濟至侯家林決口漫水下游溢入湖河雖現在均係
清水尙不遽有淤墊之患然關係運道必須急籌堵塞第
口門係黃水分溜必須諳習黃河水性工程之員辦理始
有把握卽決口合龍而上下游一帶僅恃民堰斷不足資
捍禦必應就東岸相度地勢改築官隄分汛修守始免疏
虞然地段甚長工費甚鉅已飛咨河臣迅委熟諳黃河之

員卽日來東勘估籌議奏明請

旨辦理以期於冬春趕辦無誤來歲機宜所有黃水衝決
沮河民堰災區較廣請截留漕糧備賑並咨會河臣勘辦
堵缺築隄各緣由理合由驛馳奏伏乞

皇太后

皇上聖鑒再此摺因俟委員查覆是以核奏稍遲合併聲
明謹

奏

請優卹王心安片

同治十年九月三十日

再記名提督王心安向在湖北軍營先後擊勦粵逆屢克
堅城戰功卓著經前湖廣督臣官文前湖北撫臣胡林翼
浔保參將同治元年隨荊州將軍臣多隆阿入陝援勦二
年經前山東撫臣閻敬銘咨調隨帶來東旋令招募東治
全軍派爲統領兼帶振平等營時東省初整營規該員申
明紀律聯絡偏裨治軍有法所部悉成勁旅凡助勦淄川
東昌沂州各賊巢所向克捷始以副將保留東省四年夏
閒東境捻氛愈熾添募各軍分設統領所用將官及敢戰
之士多由該員所部分撥嗣兜勦賴汝忱任柱張總愚於
山東直隸兩省撲滅全捻該員無不備歷艱險陷陣摧堅

因歷保至提督

記名簡放肅清以後東省以辦理善後事宜酌留防軍臣
令該提督以舊部數營駐紮東昌兼顧臨清濟武河北一
帶該提督巡防綏輯與民相安三載有餘辦理悉臻妥協
並能弋獲積年巨匪百餘名以除隱患乃頃據東昌府稟
報該提督重傷舉發醫藥無效於九月十六日在營身故
臣聞信之下不勝悲愕竊計該提督從前轉戰於鄂皖陝
西十餘年勞績最著嗣在東省數年辦賊凡攻剿喫緊之
際臣與同在行間見其每戰忠義激發奮不顧身從無計
較利害之心往往以少擊衆輒能獲勝卽當敵勢猖獗而
扼隊突圍不少挫銳雖以忠親王僧格林沁之忠勇絕倫

亦心重之蓋由其御下寬而能整廉而不貪故士卒無不竭力用命實屬將才中不可多得之員

臣前欽奉

諭旨遴選得力將領以備任使因念如該提督之忠誠勇敢現在實難其人幸其在東漸久情形日益熟習且年甫四十正將倚爲緩急之用茲因重傷舉發遽爾身故

臣痛

悼之餘不禁如失左右手也該提督身故後據東昌府來稟查其囊橐蕭然棺殮之費毫無所出皆由該府等集資代辦是其一無私蓄公忠體

國尤屬近時將領所難能如此良將一朝殞歿實堪憫惜惟有籲懇

天恩俯准將記名簡放提督王心安照提督立功後在營

因傷身故例從優議卹並懇

加恩予諡以慰忠藎而勵戎行除將所部派員接統外謹
附片具陳伏乞

皇太后

皇上聖鑒訓示謹

奏

病請開缺調理摺

同治十年十月十四日

奏爲

微臣

病久增劇難勝辦公醫藥一時未能奏效瀝懇

天恩俯准開缺調理恭摺仰祈

聖鑒事竊

臣

前於二月閒以怔忡大作兼泄瀉拘攣等病

復發奏蒙

恩旨賞假一月調理當卽趕緊醫治嗣假期屆滿病未大

愈

臣

自維受

恩深重未効涓埃而其時又值審理秋讞暨江北漕糧棧
鉛各船經行東境挑河築壩護送均關緊要又以海防水
師事宜急須經畫久遠規模是以於三月內勉強銷假力
疾任事然藥餌未嘗一日離也本冀多方醫治病體卽可

脫然詎自六月下旬以來溼氣薰蒸脾胃益弱飲食不思復增下血之症日甚一日近則肝血愈虧筋絡無所榮養從前左身拘攣今則日見麻木更加浮腫腰骹以下舉動維艱而怔忡之病舉發無時益復加劇月餘徹夜不眠心神昏眩不能自主語言亦多錯亂據醫家云心肝脾三部虧損已極即使方藥得宜亦斷非數月所能奏效等語伏念_臣年逾五旬自揣精力尙強正可力圖報稱無奈受病過深兼以_臣賦性急遽遇事每多躁急故自二月醫治至今迄未能稍有成效現在步履艱難精神恍惚辦公輒多瞽亂卽接見僚屬亦勢有難能病勢如此徒深焦灼竊以山東巡撫任大責重病軀肩此貽誤匪輕再四思維惟有

懇懇

天恩迅簡巡撫以專責成准臣開缺俾得設法調治儻邀
聖慈庇蔭醫治就痊卽當泥首

宮門叩求

差使決不敢稍耽安逸自外

生成所有微臣病勢增劇難勝辦公懇懇開缺調理緣由

謹恭摺具陳伏乞

皇太后

皇上聖鑒訓示謹

奏

籌堵侯家林決口銷假督工摺

同治十年十二月二十九日

奏爲遵

旨籌堵侯家林決口爲時愈迫誠恐趕辦不及

微臣謹力

疾銷假親往督工以冀勉竭人事恭摺馳陳仰祈

聖鑒事竊

臣

於同治十年十二月十三日承准軍機大臣

字寄欽奉

上諭侯家林決口於來年運道有礙且黃水入湖下游受害之處更多仍當趕緊設法於年前興工將該處決口迅速堵塞等因欽此當經署撫

臣

文彬將飭司籌款由地方

官先行購料一面飛咨河

臣

喬松年派員馳來東省及早

開工各緣由恭摺覆奏本月二十日復欽奉

諭旨以山東侯家林決口關係運道民生亟應及早堵塞不容稍涉遲緩文彬等已籌撥銀三十萬兩遴委委員帶赴工次會同地方官購辦料物著喬松年迅速委員馳抵東省並飭原估委員先行星夜赴東務卽克日興工於來年春漲以前辦理完竣並將淤墊運道一律疏濬毋稍延誤該河督等務當督飭在工各員實力籌辦總期工料堅實饒不虛糜以衛民居而利漕運等因欽此正在飭催各州縣及委員趕將應用料物上緊購運專候河員趕到興工本月二十六日又欽奉

上諭以民田運道關係匪輕自宜及早堵築爲是現在山東業已撥款購料當無缺乏之虞著喬松年仍遵前旨迅

速派委妥員赴工剋期興辦務於來年春漲以前堵築完竣若故意遷延以實其趕辦不及之言亦難逃朝廷洞鑒該處民堰亦應加高培厚以免旁決之患著丁寶楨文彬督飭地方官勸諭民間一律興工並由藩庫酌撥銀兩以資津貼等因欽此

臣等於跪讀之下仰見

聖主眷念民生周悉靡遺莫名欽感旋准喬松年鈔摺移咨於原估文武之外僅添派通判一人至掌壩各員亦僅開單由東省揀派並據函稱事由東省主政萬勿牽涉該河臣等語署撫臣文彬來商於臣檢閱咨函不勝詫異伏查侯家林決口先經喬松年以爲時較晚奏請緩辦嗣欽奉

奏和卷八
諭旨以該處決口關係運道民生必須趕緊堵築並蒙
睿慮周詳指示明切河臣職司河道疆臣身任地方均屬
責無旁貸自當遵

旨迅速籌辦縱不敢必有成效亦須竭盡心力以期上慰
聖主下對羣黎乃喬松年於欽奉

諭旨後其疊次來函來咨一概諉諸地方略不商及辦理
之事誠不知其用意所在現在節氣已過立春距清明不
及兩月若再候其的信以定行止則要工恐致貽誤復查
此處決口不堵將來漫淹曹充濟十餘州縣若再向東南
奔注則清淮裏下河一帶更形喫重是被害者數百萬生
靈而浸灌運河淤墊沿運諸湖將壞者千百年成法關係

實非淺鮮第就東省現時而論欲速辦則無可用之工員
欲暫待則無可寬之時日事處萬難幾於束手臣前以宿
疾糾纏披誠懇仰蒙

天恩賞假調理計兩月以來醫治未見全愈較前稍可支
撐今日擊民生之待斃運道之就堙補救無方何忍令署
撫臣文彬獨任艱鉅且尙未開缺卽不敢置身事外此時
喬松年旣立意諉卸臣若猶避越俎之嫌則展轉耽延實
有萬趕不及之勢躊躇再四惟有勉力銷假卽於正月初
二日親赴工次督率河工原估員弁及添派地方人員先
行擇日開工如喬松年能懷遵續奉

諭旨引爲己責和衷共事俟其所派大小員弁到工卽責

成該工員等一手經理以免隔礙之病儻仍堅持前見決
不參與臣惟有殫竭血誠嚴飭各員將決口實力趕辦惟
以地方而用河工人員既未能洞悉機宜卽難免暗滋隱
弊呼吸之頃成敗攸關惟恐欺以所不及防且誤以所不
能覺則遷延固屬無成而草率尤將債事臣亦惟有隨時
精心體察如該工員等果能勤慎將事得以剋日完工保
全大局應請破格保獎以昭激勸儻敢陽奉陰違有心遲
誤臣一經考驗得實仍請以便宜從事卽將該員弁立於
工次正法以爲罔

上殃民者戒並將臣從重治罪以謝百姓該委員等前估
工需約發實銀三十萬兩係專就堵築孟家莊河面及侯

家林決口兩處日後如需做挑水壩及估挑引河並廂做
護崖埽段等項尙有需款之處臣當詳細察看核實酌辦
以免棘手其上下游一帶民堰應另行派員會同地方官
勸諭居民一律修培以資捍禦並爲之酌定高寬丈尺示
以築做等法以期稍有可恃至災區民力維艱應卽遵奉
諭旨酌給津貼以示體恤俟事竣後將用過銀數另行奏
明總期工歸實用以仰副

聖主保護河道軫念災黎之至意至臣出省後一切日行
公事仍由藩司文彬代拆代行緊要事件包封遞工次核
辦合併陳明所有侯家林決口籌辦萬難微臣力疾銷假
親往督辦緣由謹恭摺由驛四百里馳奏伏乞

皇太后

皇上聖鑒訓示謹

奏

侯家林堵築事宜擇日進占摺

同治十一年正月二十五日

奏爲侯家林堵築事宜布置粗就因爲時已迫擬卽擇日進占以期趕辦恭摺馳陳仰祈

聖鑒事竊

臣

前因鄆城侯家林決口關係緊要謹將力疾

銷假親往督工緣由馳奏在案拜摺後卽於正月初二日起程出省因年前飭由州縣趕辦者僅稽料麻筋兩大宗此外應用雜料爲數尙多以及捆廂船隻一應器具與夫力作弁兵各項工匠皆非東省所素有不得不一一豫籌卽掌壩管廠之大小員弁亦須擇情形稍悉者分任其事當經詢訪上次榮工得力之員並就運河道所屬及地方人員略曉河務者分別咨調札委一面嚴催派辦稽麻各

州縣趕緊運解來工臣於初五日馳抵鄆城工次初七日
欽奉

諭旨山東侯家林決口關係運道民生亟應及早堵築丁
寶楨親赴工次督率河工地方員弁擇日開工卽著督飭
在事人員將決口實力趕辦剋期完工如該工員等果能
勤慎從事著有成效准由丁寶楨破格保獎儻敢陽奉陰
違有心遲誤卽著該撫從重治罪以儆玩視等因欽此臣
卽於是日親至孟家莊侯家林兩處周履確勘查上年前
河臣蘇廷樞委員薛福年王麟等前來查看因侯家林口
門溜勢甚急擬在上游孟家莊分溜之處先將河面堵合
則侯家林溜勢漸弱較易施工茲臣細勘孟家莊所擬建

壩之處兩岸雖有淤灘究恐土輒沙鬆壩基難期穩固埽口所用之土亦恐不足供用况迤南尙有支流二道均另達於侯家林口門於此處南壩進料之路尤爲阻礙卽竭力將孟家莊堵合仍須再堵侯家林欲同時並舉則慮料物之不敷欲次第施工則患時日之甚迫臣悉心體察不若專就侯家林口門堵築該處兩岸均爲老崖壩基可恃其便一內灘有土可取其便二兩壩運料俱可逕達其便三自應舍彼就此較爲切要初九日原估委員薛福年王麟暨河臣喬松年派來候補通判張錫純等由豫到工臣亦札調曾任河工雲南候補同知曹文振暨東河候選通判朱鎬飭會同詳勘妥議旋據稟稱目前形勢自以專堵

侯家林爲正辦惟口門計寬八十餘丈水比孟家莊加深
地勢較低大溜下注必須將壩身展寬兩邊埽及夾土壩
後戢方能得力且口門係屬奪溜必須擇要挑挖引河以
爲水之出路而正河先由分溜而成奪溜受淤較遠至灘
面於去冬甫經涸出卽值沍寒現時土脈初融冰凝乍釋
尺土之下卽係稀淤亦須加工趕挑等語臣查該員等所
稟尙係實在情形當卽分派爲南北掌壩官令酌定壩埽
高寬丈尺相度壩基趕緊盤築並將各項執事分別派定
以專責成另調曾挑引河人員令其估挑現在所調豫省
力作弁兵已到三百餘名其續調之三百名不日亦可到
齊其代雇之大捆廂船亦已駛抵工次各州縣承辦料物

運到者已將及半惟繩纜一切須經匠工製造急切未能
卽齊臣所夕督催萬分焦灼實緣定議堵築由臣任辦已
在十二月杪計分別部署各事爲時不及一月而頭緒紛
繁非倉卒所能集事刻計節氣已屆驚蟄亟須及時興工
現在壩基已成擬就已有料物兼程速運製造各件漏夜
加工以期源源接續臣當嚴督在壩各員敬慎將事力求
覈實斷不准因循以誤機宜仰副

聖主慎重河防軫念民生之至意至應修民堰亦經酌定
章程分派段落並籌撥銀兩以資津貼臣仍嚴飭各州縣
調集民夫分投趕辦並另派員督催以期早日完工藉資
捍禦所有籌堵候家林現已擇日進占緣由謹恭摺附驛

四百里馳奏伏乞

皇太后

皇上聖鑒訓示謹

奏